



UPA2015/38
27. maj 2015
Aaja Chemnitz Larsen

Imm. 38-mut oqaaseqaat (suliassat amerlassusissaannut missingersuut)

Ilaqutariinnermut- aamma Peqqissutsimut ataatsimiititaliap tamarmiusup nassuerutigivaa, qitiusumik siunnersuisarfik, nuna tamakkerlugu meeqqat ornittagaasa Saaffiup suliaannik annikillisaanissamik kinguneqartussa, kommunet isumaginnittoqarfinni ajornartorsiutaasa iluarsivigineqarnissaannut iliuusissatut naammanngitsaq.

Akuttunngitsumik meeqqanut tunngasut angajoqqaanit pisortaniillu sumiginarneqartut tusartarparput. Kingullertigut tusarparput meeqqat kinguaassiutitigut atonerlunneqarsimasut, kommuneniillu ilisimaneqarsimasut, ukiuni arfineq-marlunni qanoq iliuuseqarfigineqarsimanngitsut. Tamanna marloriaammik sumiginnaaneruvoq, pisortallu erseqqilluinnartumik sumiginnaanerannik taaneqarsinnaalluni. Taamaattoqarsinnaanngilluinnarpoq.

Inatsisartuni ilaasortatut pisunut taamaattunut akuersiinnannginnissamut akisussaaffeqarpugut, taamatullu inatsisit iliuuseqannginnissamut utoqqatsissutitut atorneqaannannginnissaannut sinaakkusiinissamut pisussaaffeqarluta. Piviusunit ungaseqaluta inissisimavugut, ilaatigut pisaannaat pineqanngitsut puigortarlutigit, massa pineqartut inuusut uagut qanoq iliuuseqannginnitsigut sumiginnaaqataaffigisagut. Qitiusumik siunnersuisarfik ilorraap tungaanut alloriarneruvoq, naammanngilarli.

Tamanna ataatsimiititaliami partiit tamarmik nassuerutigivaat. Iliuserisinnaasatuara tassaavoq inoqatitsinnut pingaartitsisutut misigisimanissigut saaffigissallusi, taamatullu pisap matuma kinguarsarneqarnissaanik pinngitsuuisitsillusi.

Kinguarsarneqareeqaaq, meeqqallu eqqugaasut iliuuseqarnissamut sapiissuseqarnissatsinnik pisariaqartitsipput.